


程





臨川先生文集卷第一

古詩

元豐行示德逢

後元豐行

夜夢與和甫別因寄純甫

純甫出釋惠崇畫要予作詩

徐熙花

燕侍郎山水

陶縝菜

逆沈氏妹于白鷺洲遇雪作詩寄天隲

招約之職方并示正甫書記

同王濬賢良賦龜



示元度

營居半山園作

仲明父至宿明日遂行

杏花

奉酬約之見招

寄吳氏女子

贈約之

寄楊德逢

再次前韻寄楊德逢

仲明父不至

與呂望之上東嶺

與望之至八功德水

要望之過我廬

聞望之解舟

法雲

寧碕

月夜二首

兩山間

元豐行示德逢

四山脩脩映赤日田背坳如龜兆出湖陰先生坐草  
室看踏溝車望秋實雷蟠電掣雲滔滔夜半載雨輸  
亭臯旱禾秀發埋牛尻豆死更蘇肥莢毛倒持龍骨  
挂屋敖買酒澆客追前勞三年五穀賤如水今見西  
成復如此元豐聖人與天通千秋萬歲與此同先生  
在野故不窮擊壤至老歌元豐



後元豐行

歌元豐十日五日一雨風麥行千里不見土連山沒  
雲皆種黍水秧綿綿復多稔龍骨長乾挂梁招鱒魚  
出網蔽洲渚菽筍肥甘勝牛乳百錢可得酒斗許雖  
非社日長聞鼓吳兒蹋歌女起舞但道快樂無所苦  
老翁塹水西南流楊柳中間杙小舟乘興欹眠過白  
下逢人歡笑得無愁

夜夢與和甫別如赴北京時和甫作詩覺  
而有作因寄純甫

水菽中歲樂鼎茵暮年悲同胞苦零落會合尚悽其  
況乃夢乖闊傷懷而賦詩詩言道路寒乃似北征時  
叔兮今安否季也來何遲中夜遂不眠輾轉涕流離  
老我孤主恩結草以爲期冀叔善事國有知無不爲  
千里衣相望昧昧我思之幸唯季優游歲晚相攜持  
於焉可晤語水木有茅茨晚蘭佇歸憩遶屋正華滋

純甫出釋惠崇畫要予作詩

畫史紛紛何足數惠崇晚出吾最許旱雲六月漲林  
莽移我脩然墮洲渚黃蘆低摧雪翳土鳧鴈靜立將  
儔侶往時所歷今在眼沙平水澹西江浦暮氣沈舟  
暗魚罟欹眠嘔軋如聞櫓頗疑道人三昧力異域山  
川能斷取方諸承水調幻藥灑落生綃變寒暑金坡  
巨然山數堵粉墨空多真漫與大梁崔白亦善畫曾  
見桃花淨初吐酒酣弄筆起春風便恐漂零作紅雨  
鷺流探枝婉欲語蜜蜂掇藥隨翅股一時二子皆絕



藝裘馬穿羸父羈旅華堂豈惜萬黃金苦道今人不  
如古

徐熙花

徐熙丹青蓋江左杏枝偃蹇花婀娜一見真謂值芳  
時安知有人槃礴羸同朝衆史共排媚亦欲學之無  
自可錦囊深貯幾春風借問此木何時果

燕侍郎山水

往時濯足瀟湘浦獨上九疑尋二女蒼梧之野煙漠  
漠斷壠連岡散平楚暮年傷心波浪阻不意畫中能  
更覩燕公侍書燕王府王求一筆終不與奏論讞死  
誤當赦全活至今何可數仁人義士埋黃土祗有粉  
墨歸囊楮

陶續菜

江南種菜漫阡陌紫芥綠菘何所直陶生畫此共言  
好一幅徃徃黃金百北山老圃不外慕但守荒畦斲  
荆棘陶生養日渠養腹各以所能爲物役

已未耿天隲著作自烏江來予逆沈氏妹

于白鷺洲遇雪作此詩寄天隲

辛酉冬天  
隲復來誦  
之遂書于壁請天  
隲書所酬于右

朔風積夜雪明發洲渚淨開門望鍾山松石皓相映  
故人過我宿未盡躋攀興而我方渺然長波一歸艇  
款段庶可策柴荆當未暝與子出東岡墻西掃新徑  
招約之職方并示正甫書記

往時江總宅近在青溪曲井滅非故桐臺傾尚餘竹



池塘三四月菱蔓芙蓉蘗蒲柳亦競時冥冥一川綠  
方坻最所愛意謂可穿築欲往無舟梁長年寄心目  
故人晚得此心事付草木消搖櫺宇新攬結蹊隧熟  
更能適我願中水開茆屋鬼營誅荒梗人境掃喧黷  
濠魚淨留連海鳥暖追逐豈無方外客於此停高躅  
憶初桑落時要我豈非夙蠶眠忽欲老一个未言速  
當緣東門水尚澀南浦舳吾廬雖隱翳賞眺還自足  
橫陂受後澗直塹輸前瀆跳鱗出重錦舞羽墮輓玉  
碧簫遞舒卷紫角聯出縮千枝孫嶧陽萬本母淇澳  
滿門陶令株彌岸韓侯款尚復有野物與公新聽矚  
金鈿擁蕪菁翠被敷首宿蝦蟆能作技科斗似可讀  
櫺軒俯北渚花氣時度谷耘耔聊效顰締搆行可續

荒乘儻不倦一晝敢辭卜雖無北海酒乃有平津肉  
脩脩仙李枝城市久煩促寄聲與俱來蔭我臺上穀

同王濬賢良賦龜得升字

世傳一尾龜百齡此龜逮見隋唐興雖然天幸免焦  
灼想屢縮頸愁嚴疑前年赴海不量力欲替鼈負三  
峻嶒番禺使君邂逅見知困簸蕩因嗟矜疾呼余且  
設網取以組系首擱穿繩北歸與俱度大庾兩夫鼎  
屬苦不勝艤舩秦淮擔送我云此一可當十朋昔人  
寶龜謂神物奉事槁骨尤兢兢殘民滅國遞爭奪有  
此乃敢司黎蒸於時覩甲別貴賤太卜藏法傳昆仍  
豈如元君湏見夢初知歡喜得未曾自從九江罷納  
錫衆漁賤棄秋不登卜人官廢亦已久果獵誰復知



殊稱今君此寶世莫識我亦坐視心營營搢牀纒堪  
比瓦礫當粟孰肯捐斗升糝頭腥臊何足嗜曳尾污  
穢適可憎盛洩除龔豈必驗蹈背出險安敢憑剗腸  
以占幸無事卷殼而食病未能如聞翁息可視效乃  
往有墮崖千層仰窺朝陽俯引氣亦得難老如岡陵  
諒能學此真壽類世論妄以蟲疑冰嗟余老矣倦呼  
吸起晏光景難瞻承但知故人所玩惜每戒異物相  
侵陵唯憂盜賊今好卜夜半刦請無威懲復恐嚙夫  
負之走并竊老木爲薪烝淺樊荒園不可保守視且  
寄鍾山僧

示元度

營居半山園作

今年鍾山南隨分作園囿鑿池構吾廬碧水寒可漱

瀟西雇丁壯擔土爲培塿扶踈三百株蒔棟最高茂  
不求鵝鷓實但取易成就中空一丈地斬木令結搆  
五楸東都來斲以遶簷溜老來厭世語深卧塞門竇  
贖魚與之游餒鳥見如舊獨當邀之子商略終宇宙  
更待春日長黃鸝弄清晝

仲明父至宿明日遂行

初登張公門公子始冠憤於今見公子與我偕鬢白  
山林坐語笑宛我在公側豈惟貌如之侃侃有公德  
憶公營懶鄉許我歸作客我歸公旣逝惆悵難再得  
得子如得公交懷我忻戚漂搖將安往稅駕止一昔  
寤言且勿寐庶以永今夕何時復能還裹飯治城宅

杏花



石梁度空曠茅屋臨清烟俯窺嬌饒杏未覺身勝影  
媽如景陽妃含笑墮宮井怱悵有微波殘粧壞難整

奉酬約之見招

君家段干木爲義畏人侵馮軾信厚禮踰垣終褊心  
川坻寧有此園屋諒非今雨過梅柳淨潮來蒲稗深  
種芳彌近渚伐翳取遙岑清節亦難尚曠懷差易尋  
子猷憐水竹逸少愜山林況復能招我親題漢上襟

寄吳氏女子

伯姬不見我乃今始七齡家書無虛月豈異常歸寧  
汝夫綴卿官汝兒亦摺紼兒已受師學出藍而更青  
女復知女功婉嫵有典刑自吾捨汝東中父繼在廷  
小父數往來吉音汝每聆旣嫁可願懷孰如汝听丁

而吾與汝母湯熨幸小停丘園祿一品吏卒給使令  
膏粱以晚食安步而車駟山泉臯壤間適志多所經  
汝何思而憂書每說涕零吾廬所封殖歲久愈華菁  
豈特茂松竹梧楸亦冥冥芟荷美花實瀾漫爭溝涇  
諸孫肯來游誰謂川無舫姑示汝我詩知嘉此林壑  
末有擬寒山覺汝耳目熒因之授汝季季也亦淑靈

贈約之

君曾寒而痞我齒熱以搖無方可抹藥相值久無膠  
欲尋秦越人魂逝莫能招但當觀此身不實如芭蕉

寄楊德逢

山樊老憚暑獨寤無所適湖陰宛在眼曠若千里隔  
遙聞青秧底復作龜兆坵占歲以知子將勤而後食



穿溝取西港此計當未獲脩脩兩龍骨豈得長掛壁  
晤言久不嗣作苦何時息炎天不可觸悵望新春白

再次前韻寄楊德逢

一雨洗炎烝曠然心志適如輸浮幢海滅火十八隔  
俯觀風水涌仰視電雲圻知公開霽後過我言不食  
翻然陂路長泥淖困臧獲明明吾有懷如日照東壁  
莫逢田父歸倚杖問消息渠來那得度南蕩今已白

仲明父不至

張名軒民仲明父其字也

月出映溝坻煙升隱墟落寒魚占窟聚暝鳥投枝泊  
亭臯閉晚市隴首歸新穫佇子終不來青燈耿林壑

與呂望之上東嶺

靖節愛吾廬猗玕樂吾耳適野無世誼吾今亦如此

紛紛舊可厭俗子今掃軌使君氣相求眷顧未云已  
追隨上東嶺俯仰多可喜何以況清明朝陽麗秋水  
微雲會消散豈久汗塵滓所懷在分衿藉草淚如洗

與望之至八功德水

念方與子違懍懍夜不眠起視明星高整駕出東阡  
聊爲山水遊以寫我心恂知子不鋪糟相與酌雲泉  
要望之過我廬

念子且行矣要子過我廬汲我山下泉煮我園中蔬  
知子有仁心不忍鈎我魚我池在人境不與獮獺居  
亦復無蟲蛆出沒爭腐餘食罷往遊觀鱖鰕藻與蒲  
清波映白日擺尾揚其鬚豈魚有此樂而我與子無  
擊壤謠 聖時自得以爲娛



聞望之解舟

子來我樂只子去悲如何謂言且少留大舸已凌波  
闇黥雖莫測皇明邁羲娥脩門歸有時京水非汨羅  
法雲  
法雲但見脊細路埋桑麻扶輿度酸水窈窕一川花  
一川花好泉亦好初晴漲綠深於草汲泉養之花不  
老花底幽人自衰槁

寧碕

殘暑安所逃寧碕北牕北伐翳作清曠培芳衛岑寂  
投衣挂青枝敷簟取一息涼風過碧水俯見遊魚食  
永懷少陵詩菱葉淨如拭誰當共新甘紫角方可摘  
月夜二首

山泉墮清陂陂月臨靜路惜哉此佳境獨賞無與晤  
埭口哆陂陰要予水西去呼僮擁草垞復使東南注

二

蹋月看流水水明搖蕩月草木已華滋山川復清發  
褰裳伏檻處綠淨數毛髮誰能挽姮娥俯濯凌波鞵

兩山間

自予營北渚數至兩山間臨路愛山好出山愁路難  
山花如水淨山鳥與雲閑我欲拋山去山仍勸我還  
祇應身後塚亦是眼中山且復依山住歸鞍未可攀

臨川先生文集卷第一



臨川先生文集卷第二

古詩

題南康晏史君望雲亭

游亭

光宅寺

春日晚行

新花

四皓二首

真人

寄蔡氏女子二首

夢黃吉甫

遊土山示蔡天啓秘校



再用前韻寄蔡天啟

用前韻戲贈葉致遠直講

白鶴吟示覺海元公

示安大師

示寶覺

定林示道原

我所思寄黃吉甫

寄朱昌叔

與僧道昇二首

贈彭器資

贈王居士

贈李士雲

題南康晏史君望雲亭

南康父老傳史君疾呼急索初不聞未嘗遣汲谷簾  
水三歲只望香爐雲雲徐無心澹無滓史君恬靜亦  
如此颯然一去掃遺陰便覺歎煩悵千里歸田負戴  
子與妻圃蔬園果西山西出門亭臯百頃綠望雲纔  
喜雨一犁我知新亭望雲好欲斲比隣成二老莫嫌  
雞黍數往來為報襄陽德公嫂

游亭

朝尋東郭來西路歷游亭衆山若怨思慘澹長眉青  
迸水泣幽咽復如語丁寧豈予久忘之而欲我小停  
歇鞍松栢間坐起俯軒櫺秋日幸未暮奈何雨冥冥  
光宅寺



邈然光宅淮之陰扶輿獨來止中林千秋鍾梵已變  
響十畝桑竹空成陰昔人倨堂有妙理高座翳遶天  
花深紅葵紫萸復滿眼往事無跡難追尋

春日晚行

門前楊柳二三月枝條綠煙花白雪呼僮羈我果下  
騮欲尋南岡一散愁綠岡初日溝港淨與我門前綠  
相映隔淮仍見裊裊垂佇立怱悵去年時杏花園西  
光宅路草暖沙晴正好渡興盡無人檝迎我却隨倦  
鷗歸薄暮

新花

老年少忻豫况復病在牀汲水置新花取慰此流芳  
流芳秣須臾我亦豈久長新花與故吾已矣兩可忘

四皓二首

四皓秦漢時招招莫能致紫芝可以飽梁肉非所嗜  
谷廣水渙渙山長雲泄泄泄與其貴而拘不若賤而肆

二

秦毆九州逃知力起經綸重利誘衆策頗知聚秦民  
頽然此四老上友千載魂采芝商山中一視漢與秦  
靈珠在泥沙光景不可昏道德雖避世餘風迴至尊  
嫡孽一朝正留侯果知言出處但有禮廢興豈所存

真人

予常值真人能藏毒而寧能納穢若淨能易羶使馨  
能解身赫赫能逆知冥冥日唯汝心櫻而汝耳目熒  
廓然而無營其孰擾汝靈神竒實主汝厥通莫之令



嗔予豈不知黃帝與焦螟死心而廢形乃可少聞  
顧今親遘之於吾獨剽聆刳心事斯語自做以書銘

寄蔡氏女子二首

建業東郭望城西埃千嶂承宇百泉遶雷青遙遙兮  
纏屬綠宛宛兮橫逗積李兮縞夜崇桃兮炫晝蘭馥  
兮衆植竹娟兮常茂柳蕙綿兮含姿松偃蹇兮獻秀  
鳥跂兮下上魚跳兮左右顧我兮適我有班兮伏獸  
感時物兮念汝遲汝歸兮携幼

二

我營兮北渚有懷兮歸女石梁兮以苦蓋綠陰陰兮  
承宇仰有桂兮俯有蘭嗟汝歸兮路豈難望超然之  
白雲臨清流而長嘆

夢黃吉甫

夢傳失之妄一作悲畫冀見而想豈伊不可懷而使我  
心往山林老顛眴數日占黃壤舟輿來何遲北望屢  
懍怳西城薺花時落魄隨兩槩歲晚洲渚淨水消煙  
渺莽躊躇壁上字期我無乃迂

遊土山示蔡天啓

定林瞰土山近乃在眉睫誰謂秦淮廣正可藏一鰈  
朝予欲獨往扶憊強登涉蔡侯聞之喜喜色見兩頰  
呼鞍追我馬亦以兩黥挾斂書付衣囊裹飯隨藥笈  
脩脩阿蘭若土木老山脅鼓鍾卧空曠篋篋雕捷業  
外堂廓無主考擊誰敢輒坡陀謝公冢藏椁久穿劫  
百金買酒地野老今行盭紈懷起東山勝踐比稠疊



於時國累外楚夏血常喋外實備艱楨中仍費調燮  
公能覺如夢自喻一蝴蝶桓温適自斃符堅方天厭  
且可緩九錫寧當快一捷彼哉斗筭人得喪易矜怯  
妄言屐齒折吾欲刊史牒傷心新城埭歸意終難愜  
漂搖五城舟尚想浮河楫千秋隴東月長照西州堞  
豈無華屋處亦捉蒲葵箠碎金諒可惜零落隨秋葉  
好事所傳玩空殘法書帖清談眇不嗣陳迹恍如接  
東陽故侯孫少小同鼓篋一官初嶺海仰視飛鳶跼  
窮歸放款段高卧停遠蹠牽襟肘即見著帽耳纔摩  
數椽危敗屋爲我炊陳浥雖無膏汚鼎尚有羹濡筴  
縱言及平生相視開笑靨邯鄲枕上事且飲且田獵  
或昏眠委翳或妄走超躡或叫號而寤或哭泣而魘

幸哉同聖時田里老安帖易牛以寶劍擊壤勝彈鋏  
追憐衰晉末此土方岌業強偷湏臾樂撫事終愁懞  
予雖天戮民有械無接摺翁今貧而靜內熱非復葉  
予衰極今歲儻與雞夢協委蛻亦何恨吾兒已長鬣  
翁雖齒長我未見白可鑷祝翁尚難老生理歸善攝  
久留畏年少譏我兩咭囁束火扶路還宵明狐兔懾  
蔡侯雄俊士心僚形亦謀異時能飛鞚快若五陵俠  
胡爲阡陌間躑足僅相躡諒欲交轡語怯子不能嚼

再用前韻寄蔡天啓

蔡侯東方來取友無所挾脩脩一囊衣偶以一書笈  
定林朝自炊有匕或無筴時時羹藜藿鑊大苦難燮  
驕頑遂敢侮有甚觀駢脅澹然山谷中變色未嘗輒



始見類欺魄寒暄粗訓接從容與之語爛漫無不涉  
竒經可治疾祕祝可解魘巫醫之所知瞽史之所業  
載車必百兩獨以方寸攝微言歸易悟疾若髭赴鑷  
天機信卓越學等何足躡縱談及既往每與唐許協  
揚雄尚漢儒韓愈真秦俠好大人謂狂知微乃如謀  
惟知造文字人惑鬼愁懾秦愚既改臯新眊仍易疊  
六書遂失指隸草矜敏捷誰珍檀山刻共賞蘭亭帖  
東京一祭酒收拾偶予愜少嘗妄思索老懶因退怯  
侯方習篆籀寸管靜嘗摩深原道德意助我耕且獵  
昔功恐唐捐異味今得饁京口媚學子追師嘗劫劫  
陸羸淮汴糧水儗湖海艤遠求而近遺如目不見睫  
僞鳳易悅楚真龍反驚葉聞予再三歎往往心不厭  
或自逸而走或吐而不嚼或嗤元郎漫或訛白翁囁  
鑠金徒欲消韞玉豈愁浥賢愚有定分咄汝無喋喋  
跨鞍隨我遊曳徒聯我跼照泉挹清泚跂石緣鬼業  
東陂數儵魚西崦追蛺蝶翳林窺搏黍藉草聽批頰  
黃尋遠蓮鬚紅閱鄰杏靨荏苒光景流楊園忽無葉  
扶病歸未久吾見喜寧帖褰裳告我去祿仕當隨牒  
蕭晨秣款段歸騎得追躡謂言循東路覆出西城堞  
行矣忍羈旅無魚勿彈鋏天閑久索驥駿足方騰蹀  
長驅勿驕矜小踈亦勿慄鵬飛九萬里勿借風一筆  
溟波浩難窮勉自養鱗鬣爵祿實天械功名爲接摺  
寧能復與我搖漾秦淮楫附書勿辭頻隔歲期滿篋  
用前韻戲贈葉致遠直講



葉侯越著姓胄出實楚葉縉雲雖窮遠冠蓋傳累葉  
心大有所潛肩高未嘗脅飄飄凌雲意強禦莫能懾  
辟雍海環流用汝作舟楫開胷出妙義可發矇起魘  
詞如太阿鋒誰敢觸其鈇聽之心凜然難者口因嚼  
搏飛欲戔戔鍛墮今跼跼忘情塞上馬適志夢中蝶  
若金靜無求在冶惟所挾載醪但彼惑饋漿非我謀  
經綸安所施有寓聊自愜棊經看在手棊訣傳滿篋  
坐尋棊勢打側寫棊圖貼攜持山林衮刺擿溝港艤  
一枰嘗自副當熱寧忘筴反嗤襍襍子但守一經笈  
亡羊等殘生朽筴何足捐歡然值手敵便與對匕筴  
縱橫子墮局膈膊聲出堞樵父弛遠擔牧奴停晏盍  
旁觀各技癢竊議兒女囁所矜在得喪聞此更心慄

熟視籠兩手徐思撚長鬣微吟靜悄悄堅坐高帖帖  
未快巖谷叟斧柯嘗爛浥趨邊耻局縮穿腹愁危業  
或撞關以攻或覷眼而壓或羸行伺擊或猛出追躡  
垂成忽破壞中斷俄連接或外示閒暇伐事先和變  
或冒突超越鼓行令震疊或粗見形勢驅除令遠蹀  
或開拓疆境欲并包揔攝或僅殘尺寸如黑子著靨  
或橫潰解散如尸僵血喋或慙如告亡或喜如獻捷  
陷敵未甘虜報仇方借俠諱輸寧斷頭悔悞乃批頰  
終朝已罷精旣夜未交睫翻然悟且歎此何宜劫劫  
孟軻惡妨行陶侃懲廢業揚雄有前言韋曜存往牒  
晉臣抑帝手梭侯何啻涉冶城子爭道拒父乃如輒  
爭也實逆德豈如私鬪怯藝成况窮苦此殆天所厭



明集三  
如今劉與李倫等安可躡試令取一毫亦乏寸金鑷  
以此待君子未與回參協操具投諸江道耕而德獵

白鶴吟示覺海元公

白鶴聲可憐紅鶴聲可惡白鶴靜無匹紅鶴喧無數  
白鶴招不來紅鶴揮不去長松受穢死乃以紅鶴故  
北山道人曰美者自美吾何爲而喜惡者自惡吾何  
爲而怒去自去耳吾何闕而追來自來耳吾何妨而  
拒吾豈厭喧而求靜吾豈好丹而非素汝謂松死吾  
無依邪吾方捨陰而坐露

示安大師

道人深北山爲家宴坐白露眠蒼霞手扶椀杖雖老  
矣走險尚可追麈麇踞堂俯視何所有窈窕樛木垂  
槿樵深尋石路仍有栗持以饋我因烹茶

示寶覺

宿雨轉歎煩朝雲擁清迴蕭蕭碧柳軟脉脉紅蕖靚  
默卧如有懷荒乘豈無興幽人適過我共取牆陰徑

定林示道原

昨登定林山俯視東南陔但見一方白莫知所從來  
濕銀注寒晶奩以青培堆迢迢晻靄中疑有白玉臺  
是夕清風興煩雲豁然開常娥攀桂枝顧景又徘徊  
杖藜忽高秋陳迹與子陪壯觀非復昔平蕪夜莓苔

我所思寄黃吉甫

我所思兮在彭蠡一奩寒晶徑千里天低紺滑風靜  
止月澹星渟尤可喜亦復可憐波浪起琉璃崩嵌湧



顛索萬斛之舟簸一葦超邑越都如歷指岸沙雪積  
山雲委雲半飛泉挂龍尾跳空散作平地水牛乳芳  
甘那得比蘿菹冥冥陰演迤稍上尋源出奇詭像圖  
釋迦祠老子臺殿掩靄相重累石槽環除逗清泚松  
竹靚深無虎虺其徒脩然棄塵滓雖未應真終適已  
黃侯可與談妙理視棄榮宦猶弊屣每採紫芝求石  
髓我欲從之勸游徙穀城公孫能若此五老聞之當  
啓齒寄聲五老吾念爾相見無時老將死

寄朱昌叔

西安春風花幾樹花邊飲酒今何處一盃塞上看黃  
雲萬里寄聲無鴈去世事紛紛洗更新老來空得滿  
衣塵青山欲買江南宅歸去相招有此身

與僧道昇二首

昇也初見我膚腴仍潔白今何苦而老手脚皴以黑  
聞有道人者於今號禪伯黝汝以一句西歸瘦如腊  
汝觀青青枝歲寒好顏色此松亦有心豈問庭前栢

二

跋陀羅師能幻物幻穢爲淨持幻佛佛幻諸天以戲  
之幢幡香果助設施茫然悔欲除所幻還爲幻佛力  
所持佛天與汝本無間汝今何恭昔何慢十方三世  
本來空受記豈非遭佛幻

贈彭器資

翻水滔天竟東注氣澤所鍾賢可慕文章浩渺足波  
瀾行義迢迢有歸處中江秋浸兩崖間溯洄與我相



往還我挹其清久未竭復得縱觀於波瀾放言深入  
妙雲海示我僊聖本所寰楞伽我亦見髣髴歲晚所  
悲行路難

贈王居士

武林王居士與子俱學佛以財供佛事不自費一物

贈李士雲

李子山水人而常寓城郭毫端出窈窕心手初不著  
我聞大梵天擎跨雞孔雀執鈴揚赤幡浩劫淨無作  
佳哉子能圖可以慰寂寞相與驗其真他年在寥廓

臨川先生文集卷第二

臨川先生文集卷第三

古詩

題半山寺壁二首

定林寺

題定林壁

移桃花示俞秀老

對碁與道原至草堂寺

書八功德水庵

放魚

霾風

偶書

即事二首



擬寒山拾得二十首

自遣

自喻

古意

吾心

無營

病起

獨歸

獨卧

無動

夢

車載板二首

跋黃魯直畫

過楊德逢莊

秋熱

秋早

題半山寺壁二首

我行天即雨我止雨還住雨豈為我行邂逅與相遇

二

寒時暖處坐熱時涼處行衆生不異佛佛即是衆生

定林寺

衆木凜交覆孤泉靜橫分楚老一枝筇於此傲人羣  
城市少美蔬想今困憒焚且憑東北風持寄嶺頭雲

題定林壁



臨川集三  
定林自有主我爲林下客客主各有心還能共岑寂  
移桃花示俞秀老

舍南舍北皆種桃東風一吹數尺高枝柯薦綿花爛  
熳美錦千兩敷亭臯晴溝漲春綠周遭俯視紅影移  
漁舸山前邂逅武陵客水際髣髴秦人逃攀條弄  
芳畏晚晚已見黍雪盤中毛仙人愛杏令虎守百年  
終屬樵蘇手我衰此果復易朽蟲來食根那得久  
池紺絕誰見有更值花時且追酒君能酪酏相隨  
否

對棊與道源至草堂寺

北風吹人不可出清坐且可與君棊明朝投局日未  
晚從此亦復不吟詩

書八功德水庵

幽獨若可厭真實爲可喜見山不礙目聞水不逆耳  
脩然無所爲自得而已矣

放魚

捉魚淺水中投置最深處當暑脫煎熬脩然泳而去  
豈無良庖者可使供七箸物我皆畏苦捨之寧啖茹

霾風

霾風摧萬物暴雨膏九州卉花何其多天闕亦已稠  
白日不照見乾坤莽悲愁時也獨奈何我歌無有求

偶書

惠施說萬物繁特忘一句寄語讀書人嗶嗶非勝處

即事二首



雲從鍾山起却入鍾山去借問山中人雲今在何處

二

雲從無心來還向無心去無心無處尋莫覓無心處  
擬寒山拾得二十首

牛若不穿鼻豈肯推人磨馬若不絡頭隨宜而起卧  
乾地終不沈平地終不墮擾擾受輪迴祇緣疑這箇

二

我曾爲牛馬見草豆歡喜又曾爲女人歡喜見男子  
我若真是我祇合長如此若好惡不定應知爲物使  
堂堂大丈夫莫認物爲已

三

凡夫當夢時眼見種種色此非作故有亦非求故獲

不知今是夢道我能畜積貪求復守護嘗怕水火賊  
既覺方自悟本空無所得死生如覺夢此理甚明白

四

風吹瓦墮屋正打破我頭瓦亦自破碎豈但我血流  
我終不嗔渠此瓦不自由衆生造衆惡亦有一機抽  
渠不知此機故自認愆尤此但可哀憐勸令真正脩  
豈可自迷悶與渠作冤讎

五

若言夢是空覺後應無記若言夢非空應有真實事  
燔燒陽自招沈溺陰自致令汝嘗驚魘豈知安穩睡

六

人人有這箇這箇沒量大坐也坐不定走也跳不過



鋸也解不斷鎚也打不破作馬便搭鞍作牛便推磨  
若問無眼人這箇是甚麼便遭伊纏繞鬼窟裏忍餓

七

我讀萬卷書識盡天下理智者渠自知愚者誰信爾  
奇哉閑道人跳出三句裏獨悟自根本不從他處起

八

幸身無事時種種妄思量張三袴口窄李四帽簷長  
失脚落地獄將身投鑊湯誰知受熱惱却不解思涼

九

有一即有二有三即有四一二三四五有亦何妨事  
如火能燒手要須方便智若未解傳薪何須學鑽燧

十

昨日見張三嫌他不守已歸來自悔責分別亦非理  
今日見張三分別心復起若除此惡習佛法無多子

十一

傀儡祇一機種種沒根栽被我入棚中昨日親看來  
方知棚外人擾擾一場散終日受伊謾更被索錢財

十二

季生坦蕩蕩所見實奇哉問渠前世事答我燒炭來  
炭成能然火火過却成灰灰成即是土隨意立根栽

十三

衆生若有我我何能度脫衆生若無我已死應不活  
衆生不了此便聽佛與奪我無我不二四天王獻鉢

十四



莫嫌張三惡莫愛李四好既往念即晚未來思又早  
見之亦何有歛然如電掃惡既是磨滅好亦難長保  
若令好與惡可積如財寶自始而至今有幾許煩惱

十五

失志難作福得勢易造罪苦即念快樂樂即生貪愛  
無苦亦無樂無明亦無昧不屬三界中亦非三界外

十六

打賊賊恐怖看客客喜歡亦有客是賊切莫受伊謾  
樂哉貧兒家無事役心肝既無賊可打豈有客須看

十七

本魂魄散逃逃區休來講下坐

有一種貧兒不能自營生若不作客走即須隨賊行  
復有一種貧常時腹彭亨若有亦不畜若無亦不營

十八

汝無名高者以見利貪叨汝無行實者以取著名高  
行實尚非實利名豈堅牢一朝投土窟魂魄散逃逃

十九

勇有孟施舍能無懼而已若人學佛法勇亦當如此  
休來講下坐莫入禪門裏但能一切捨管取佛歡喜

二十

利瞋汝刁山濁愛汝灰河汝癡分別心即汝澹魔羅  
圓成但一性一切法依他徧了一切法不如且頭陀

自遣

閉戶欲推愁愁終不肯去底事春風來留愁愁不住

自喻



莫嫌張三惡莫愛李四好既往念即晚未來思又早  
見之亦何有歛然如電掃惡既是磨滅好亦難長保  
若令好與惡可積如財寶自始而至今有幾許煩惱

十五

失志難作福得勢易造罪苦即念快樂樂即生貪愛  
無苦亦無樂無明亦無昧不屬三界中亦非三界外

十六

打賊賊恐怖看客客喜歡亦有客是賊切莫受伊謾  
樂哉貧兒家無事役心肝既無賊可打豈有客須看

十七

有一種貧兒不能自營生若不作客走即須隨賊行  
復有一種貧常時腹彭亨若有亦不畜若無亦不營

十八

汝無名高者以見利貪叨汝無行實者以取著名高  
行實尚非實利名豈堅牢一朝投土窟魂魄散逃逃

十九

勇有孟施舍能無懼而已若人學佛法勇亦當如此  
休來講下坐莫入禪門裏但能一切捨管取佛歡喜

二十

利瞋汝刁山濁愛汝灰河汝癡分別心即汝澹魔羅  
圓成但一性一切法依他徧了一切法不如且頭陀

自遣

閉戶欲推愁愁終不肯去底事春風來留愁愁不住

自喻



岸涼竹娟娟水淨菱帖帖鰕搖浮遊鬚魚鼓嬉戲鬣  
釋杖聊一榻褰裳如可涉自喻適志歟翩然夢中蝶

古意

采芝天門山寒露淨毛骨帝青九萬里空洞無一物  
傾河略西南晶射河鼓沒蓬萊眼中見人世歎超忽  
當時棄桃核聞已撐月窟且當呼阿環乘興弄溟渤

吾心

吾心童稚時不見一物好意言有妙理獨恨知不早  
初聞守善死頗復吝肝腦中稍歷艱危悟身非所保  
猶然謂俗學有指當窮討晚知童稚心自足可忘老

無營

無營固無尤多與亦多悔物隨擾擾集道與脩然會

墨翟真自苦莊周吾所愛萬物莫足歸此言猶有在

病起

稚金敷新涼老火弛殘濁桃枝煖典忍散髮晞曉捉  
煩痾脫然愈靜若遺身覺移榻欹獨眠欣佳恐難數

獨歸

鍾山獨歸雨微冥稻畦夾岡半黃青疲農心知水未  
足看雲倚木車不停悲哉作勞亦已久暮歌如哭難  
爲聽而我官閑幸無事北窻枕簟風泠泠於時荷花  
擁翠蓋細浪颺雪千娉婷誰能歌眼共此樂秋港雖  
淺可揚舲

獨卧有懷

午鳩鳴春陰獨卧林壑靜微雲過一雨浙瀝生晚聽



紅綠紛在眼流芳與時競有懷無與言佇立鍾山暝  
無動

無動行善行無明流有流種種生住滅念念聞思修  
終不與法縛亦不着僧裘

夢

知世如夢無所求無所求心普空寂還似夢中隨夢  
境成就河沙夢功德

車載板二首

荒哉我中園珍果所不產朝暮惟有鳥自呼車載板  
楚人聞此聲莫有笑而莞而我更歌呼與之相往返  
視遇若搏黍好音而睨眈壤壤生死夢又知無可揀  
物弊則歸土吾歸其不晚歸歟汝隨我可相蒿里挽

二

鳥有車載板朝暮嘗一至世傳鵬似鴉而此與鴉似  
唯能預人死以此有名字疑即賈長沙當時所遭值  
洛陽多少年擾擾經世意粗聞方外語便釋形骸累  
吾衰久捐書放浪無復事尚自不見我安知汝爲異  
憐汝好毛羽言音亦清麗胡爲太多知不默而見忌  
楚人旣憎汝彈射將汝利且長隨我遊吾不汝羹哉  
跋黃魯直畫

江南黃鷁飛滿野徐熙畫此何爲者百年幅紙無所  
直公每玩之常在把

過楊德逢莊

攜僧出西路日晏昧所投循河望積穀一飽覺易謀



稚子舉椀出咄嗟見盤羞飯新秔有香煮菜旨且柔  
暮從秀崑歸秣蹇得少留捧腹笑相語果然無所求

秋熱

火騰爲虐不可摧屋窄無所逃吾骸織蘆編竹繼櫚  
宇架以松櫟之條枚豈惟賓至得清坐因有餘地蘇  
陪臺愆陽陵秋更暴橫熈我欲作昆明灰金流玉熠  
何足恠烏焚魚爛爲可哀憶我少時亦值此儵然但  
以書自理老衰奄奄氣易奪撫卷豈復能低徊西風  
忽送中夜濕六合一氣窰新開簾窻幕戶便防冷且  
恐霰雪相尋來

秋早

暮尋蔡墩西獨覺秋尚早山路葩卉繁野田風日好  
禪林烏未泊經屋塵初掃蠶藤五花簾復足休吾老

臨川先生文集卷第三



臨川先生文集卷第四

古詩

同沈道源遊八功德水

望鍾山

思北山

上南崗

謝公墩

秋夜泛舟

和耿天隲同遊定林

次韻約之謝惠詩

次韻舍弟江上

酬王濬賢良松泉二詩



荅俞秀老

清涼寺送王彥魯

送惠思上人

老景

雜詠八首

張良

司馬遷

諸葛武侯

讀墨

讀秦漢問事

幽谷引

明妃曲二首

桃源行

食黍行

歎息行

送春

兼并

同沈道源遊八功德水

寒雲靜如癡  
寒日慘如戚  
解鞍寒山中  
共坐寒水側  
新甘出短綆  
一酌煩可滌  
仰攀青青枝  
木醴何所直

望鍾山

佇立望鍾山  
陽春更蕭瑟  
暮尋北郭歸  
故遶東岡出

思北山

日日思北山  
而今北山去  
寄語白蓮庵  
迎我青松路



上南崗

暮塢屋荒涼寒陂水清淺捐書息微倦委轡隨小蹇  
偶攀黃黃柳却望青青巘幽尋復有興未覺西林晚

謝公墩

走馬白下門投鞭謝公墩昔人不可見故物尚或存  
問樵樵不知問牧牧不言摩挲蒼苔石點檢屐齒痕  
想此絳長檣想此倚短轅想此玩雲月狼籍盤與罇  
井逕亦已沒漫然禾黍村摧藏羊曇骨放浪李白魂  
亦已同山丘緬懷蒔蘭蓀小草戲陳迹甘棠詠遺恩  
萬事付鬼籙恥榮何足論天機自開闔人理孰畔援  
公色無懼喜儻知禍福根涕淚對桓伊暮年無乃昏

秋夜泛舟

池塹秋水淨扁舟遡涼颼的皪荷上珠俯映踈星搖  
深尋畏魚冷中路且回橈冥冥菰蒲中乃復有驚跳

和耿天騰同遊定林

道人深閉門二客來不速攝衣負朝暄一笑皆捧腹  
逍遙烟中策放浪塵外躅晤言或世聞誰謂非絕俗  
次韻約之謝惠詩

魚跳桑柳陰鳥落蒲葦側已無谿姑祠何有江令宅  
故人耽田里老脫尚方舄開亭捐百金於此掃塵迹  
地偏人罕至心遠境常寂我行西州旋稅駕候顏色  
相隨望南山水際因一息公時指岸木謁此可尋尺  
伐之營中止持用自怡懌懌言俟其成邀我堂上食  
百憂每多違一諾還自惕春風欄楹新坐久膝前席



脩然忘故約北郭疑有適長誼舒永懷佇想對以臆  
摘辭甚有理竊比書石鷁知公不欺我把玩果心惻  
嘉肴旣夙設麗菓仍虛擲左車公自迎右券吾敢責  
聞說毛羹臙芬香出鄰壁婦休機杼事兒失刀槩職  
何膠膠擾擾而紛紛籍籍攜持欲一往繼此方如織  
元龍但高眠司馬勿親滌幾能孩童舊握手皆鬢白  
有興即聯韉東阡與南陌

次韻舍弟江上

岸紅歸欲稠渚綠合猶晚晴沙上屐輕暖水隨帆遠  
吹波戲魚動掠葉飛禽返著意覓幽蹊桃花悞劉阮  
酌王濬賢良松泉二詩

松

世傳壽可三松倒此語難爲常人道人能百歲自古  
稀松得千年未爲老我移兩松苦不早豈望見渠身  
合抱但憐衆木摠漂搖顏色青青終自保兔絲茯苓  
會當有邂逅食之能壽考不知篝火定何人且看森  
垂覆荒草君詩愛我亦古意秀眉昔比南山栲復謂  
留侯不及我人或笑君無白皁求僊辟穀彼誠悞未  
見赤松饑已槁豈如強飯適志遊封殖蒼官蔭華皓  
赤松復自無特操上下隨烟何慙慙蒼官受命與舜  
同真可從之忘髮編詩雖祝我以再黑積雪已多安  
可掃試問蒼官值歲寒戴白孰與蒼然好

泉

宋興古刹今長干靈躍臺殿荒檀藥二泉相望棄不



溧西泉尚案三石槃其流散漫爲沮洳稍集小礫生  
微瀾東泉土梗久蔽塞穿治乃見甃甃完道人慈哀  
波及遠溝蕩兩取合土山山前灌輸各自足輓轡罷  
轉井口閑取遙比甘覺近美與舊爭冽知新寒蟲蟲  
夏秋百源乾抱甕復道愁蹒跚疾傾橫逗勢未足嗟  
此善利何時殫慮長易脆有大檀伐堅羗廬窟孱顏  
金多匠手冑出巧風水千里安知難沒羽之虎行林  
間籜龍失職因藏跽循除靜投悲瑟瑟映尾微見清  
潺潺三年營之一日就有口共以成爲懽論功信可  
多後觀何似當時萬竹蟠

荅俞秀老

諸偶緣安有實相非相偶雖神如季咸終亦失而走

清涼寺送王彥魯

空懷誰與論夢境偶相值莫將漱流齒欲挂功名事  
送惠思上人

黃鶴撫四海翻然落中州一聽笙與鏞低回如有求  
飛鳴阿閣上好與鳳皇遊顧憐魯東門無事反悲愁  
歲晏忽驚矯問胡不少留因知網羅外猶有稻梁謀

老景

哀古  
人名

老景春可惜無花可留得繞屋褚先生蕭蕭何所直  
每嫌柳渾青追悵李太白多謝安石榴向人紅藥拆

雜詠八首

萬物余一體九州余一家秋毫不爲小徼外不爲遐  
不識壽與夭不知貧與賒忘心乃得道道不去紛華



近迹以觀之堯舜亦泥沙莊周謂如此而世以爲夸

二

神龍豢可致猛虎擾亦留變生父子間上聖不能謀  
常情在欲得義養或成仇他人恩更輕患禍信難周

三

古風致遜悌班白見尊優薄俗謬爲恭獨在勢權尤  
伏波迷俯仰愛禮坐成仇斷斷洙泗間豈是老者羞

四

羔豚窘虎豹鳩雀窮鷹鷂巧者具機弋鷙猛還拘孿  
論功莫如神論大莫如天悲哉區區人乃欲逃其間

五

黃雀死彈丸厥臯在啄粟翠鴿不近人何爲亦窮辱

材爲世所利高下同僵仆能逃天地間蟻蠓無不足

六

關雎后之淑棧樸王之明兔置尚好德況乃公與卿  
所以彼行葦敦然遂其生誰能絃者歌爲我發古聲

七

召公方伯尊材亦聖人亞農時憚煩民聽訟甘棠下  
嗟今千室長已耻問耕稼彈琴高堂上欲以世爲化

八

任公蹲海濱一釣飽千里用力已云多鈎緝亦難理  
巨魚暖更逃壯士饑欲死游儵不可數空滿滄浪水

張良

留侯美好如婦人五世相韓韓入秦傾家爲主合壯



士博浪沙中擊秦帝脫身下邳世不知舉國大索何  
能爲素書一卷天與之穀城黃石非吾師固陵解鞍  
聊出口捕取項羽如嬰兒從來四皓招不得爲我立  
棄商山芝洛陽賈誼才能薄擾擾空令絳灌疑

司馬遷

孔鸞負文章不忍留枳棘嗟子刀鋸間悠然止而食  
成書與後世憤悱聊自釋領略非一家高辭殆天得  
雖微樊父明不失孟子直彼欺以自私豈啻相十百

諸葛武侯

漢日落西南中原一星黃羣盜伺昏黑聯翻各飛揚  
武侯當此時龍臥獨摧藏掉頭梁甫吟羞與衆爭光  
邂逅得所從幅巾起南陽崎嶇巴漢間屢以弱攻強

暉暉若長庚孤出照一方勢欲起六龍東迴出扶桑  
惜哉淪中路怨者爲悲傷豎子祖餘策猶能走強梁

讀墨

誰爲堯舜徒孔子而已矣人皆是堯舜未必知孔子  
伯夷不辱身柳下援而止孔子尚有言我則異於是  
兼愛爲無父排斥固其理孔墨必相用自古寧有此  
退之嘲魯連顧未知之耳如何蔽於斯獨有見於彼  
凡人工自私翟也信竒偉惜乎不見正遂與中庸詭  
退之醇孟軻而駁荀楊氏至其趣舍間亦又蔽於已  
化而不自知此語孰云俚詠言以自警吾詩非好詆

讀秦漢間事

秦徵天下材入作阿房宮宮成非一木山谷爲窮空



子羽一炬火驪山三月紅能令掃地盡豈但焚人功

幽谷引

雲翳翳兮谷之幽天將雨我兮田者之稠有繩于防  
兮有畚于溝我公不出兮誰省吾憂日暉暉兮山之  
下歲則熟兮收者舞吾收滿車兮棄者滿筥誰吾與  
樂兮我公燕語山有木兮谷有泉公與客兮醉其間  
芳可搴兮甘可漱無壯無穉兮環公以笑公歸而醉  
兮人則喜公好我州兮殆其肯止公歸不醉兮我之  
憂豈其不憚兮將舍吾州公一朝兮去我我歲歲兮  
來遊皖亭兮使勿毀以慰吾兮歲歲之愁

明妃曲二首

明妃初出漢宮時淚濕春風鬢脚垂低徊顧影無顏  
色尚得君王不自持歸來却怪丹青手入眼平生幾  
曾有意態由來畫不成當時枉殺毛延壽一去心知  
更不歸可憐著盡漢宮衣寄聲欲問塞南事只有年  
年鴻鴈飛家人萬里傳消息好在羶城莫相憶君不  
見咫尺長門閉阿嬌人生失意無南北

二

明妃初嫁與胡兒羶車百兩皆胡姬含情欲說獨無  
處傳與琵琶心自知黃金捍撥春風手彈看飛鴻勸  
胡酒漢宮侍女暗垂淚沙上行人却回首漢恩自淺  
胡自深人生樂在相知心可憐青冢已蕪沒尚有哀  
絃留至今

桃源行



望夷宮中鹿爲馬秦人半死長城下避時不獨商山  
翁亦有桃源種桃者此來種桃經幾春採花食實枝  
爲薪兒孫生長與世隔雖有父子無君臣漁郎漾舟  
迷遠近花間相見因相問世上那知古有秦山中豈  
料今爲晉聞道長安吹戰塵春風回首一霑巾重華  
一去寧復得天下紛紛經幾秦

食黍行

周公兄弟相殺戮李斯父子夷三族富貴常多患禍  
嬰貧賤亦復難爲情身隨衣食南與北至親安能常  
在側謂言黍熟同一炊歛見隴上黃離離遊人中道  
忽不返從此食黍還心悲

歎息行

官驅群囚入市門妻子慟哭白日昏市人相與說囚  
事破家劫錢何處村朝廷法令亦寬大汝臯當死誰  
云寬路侑年少歎息汝正觀元元之子孫

送春

武陵山下朝買船風吹宿霧山花鮮萬家笑語橫青  
天綺窻羅幕舞嬋娟小鬟折花叩船舫玉琰寫酒醕  
金錢朱甍飛動浮雲巘天外篔簹來宛轉斷橋人行  
夕陽路樓觀瑠璃影中見酡顏未分驂駟催燭入坐  
客猶徘徊豈知閭闔門邊住春盡不見芳菲開日月  
紛紛車走坂少年意氣何由挽洞庭浪與天地白塵  
昏萬里東浮眼黑貂裘敝歸幾時相見綠剗啼黃鸝  
榮華俯仰憂患隨命駕吾與高人期



兼并

三代子百姓公私無異財人主擅操柄如天持斗魁  
賦予皆自我兼并乃姦回姦回法有誅勢亦無自來  
後世始倒持黔首遂難裁秦王不知此更築懷清臺  
禮義日已偷聖經久堙埃法尚有存者欲言時所咤  
俗吏不知方培克乃爲材俗儒不知變兼并可無摧  
利孔至百出小人私闔開有司與之爭民愈可憐哉

臨川先生文集卷第四

臨川先生文集卷第五

古詩

和吳御史汴渠

酬王詹叔奉使江南訪茶利害

酬王伯虎

荅虞醇翁

送潮州呂使君

寄曾子固二首

虎圖

次韻信都公石枕斲篔

和吳沖卿雪

和沖卿雪詩并示持國



送石賡歸寧

送張拱微出都

寄題睡軒

冲御席上得作字

塞翁行

白溝行

河間

陳橋

澶州

和吳御史汴渠

鄭國欲弊秦渠成秦富彊本始意已陋末流功更長  
維汴亦如此浚源在淫荒歸作萬世利誰能弛其防

夷門築天都橫帶國之陽漕引天下半豈云獨荆揚  
貨入空外府租輸陳太倉東南一百年寡老無殘糧  
自宜富京師乃亦窘蓋藏征求過夙昔機巧到廷芒  
御史閔其然志欲窮舟航此言信有激此水存何傷  
救世詎無術習傳自先王念非老經綸豈易識其方  
我懶不足數君材仍自強他日聽施設無乃棄篇章

酬王詹叔奉使江南訪茶利害

余聞古之人措法貽厥後命官惟賢材職事又習狃  
止能權輕重王府則多有豈嘗摧其子而為民父母  
當時所經營今十已毀九其一雖幸在漂搖亦將朽  
公卿患才難州縣固多苟詔令雖數下紛紛誰與守  
官居甚傳舍位以聲勢受既不責施為安能辨賢不



區區欲揀弊萬謗不容口天下大安危誰當執其咎  
勞心適有罪養譽終天醜豈惟祖子孫教戒及朋友  
貴者大其領詩人歌四牡至尊空獨憂不敢樂飲酒  
哥矣富阡陌哀哉此無糗鄉閭人所懷今或棄而走  
豈無濟時術使爾安畎畝故今二三公戮力思矯揉  
求惟東南害茶法蓋其首私藏與竊販犴獄常紛糾  
輸將一不足往往死鞭杻販陳彼雜惡強賣曾非誘  
已云困關市且復搔林藪將更百年弊謂民知可否  
出節付羣材詢謀欲經乂朝廷每若此自可躋仁壽  
因知從今始漸欲人財阜吾宗恢竒士選使自朝右  
聰明諒多得爲上歸析剖王程雖薄遽邦法難鹵莽  
願君博諮諏無擇壯與耆余知茶山民不必生皆厚

獨當征求任尚恐難措手孔稱均無貧此語今可取  
譬欲輕萬鈞當令衆人負強言豈宜當聊用報瓊玖

酬王伯虎

吾聞人之初好惡尚無朕帝與鑿耳目賢愚遂殊品  
爾來百千年轉化薄愈甚父翁相販賣浮詐誰能審  
睢盱猴纓冠狼籍鼠穴寢滄海恐值到誰論魚鼈恣  
鴉聲雖云惡革去在食甚嗟誰職教化獨使此風稔  
恬觀不知救坐費太官廩予生少而戇好古乃天稟  
念此俗衰壞何嘗敢安枕有時不能平悲吒失食飲  
唯子同我病亦或涕沾衽謂子可告語密以詩來諗  
爛然辭滿紙秋水濯新錦窮觀何拳拳靜念復凜凜  
賤貧欲救世無寧猶拾瀋說窮且版築尹屈唯烹飪



逢時豈遽廢避俗聊湏噤徂年幸未暮此意可勤恁  
荅虞醇翁

輟學以從仕仕非吾本謀欲歸諒不能非敢忘林丘  
臨餐耻苟得翼以盡心疇萬事等畫墁雖勤亦何收  
揚揚古之人彼職乃無憂感子撫我厚欲言祗慙羞

送潮州呂使君

韓君揭陽居戚嗟與死隣呂使揭陽去笑談面生春  
當復進趙子詩書相討論不必移鱷魚詭怪以疑民  
有若大顛者高材能動人亦勿與爲禮聽之汨彝倫  
同朝叙朋友異姓接婚姻恩義乃獨厚懷哉余所陳

寄曾子固二首

巖巖中天閣藹藹層雲樹爲子望江南蔽虧無行路  
平生湖海士心迹非無素老矣不自知低徊如有慕  
傷懷西風起心與河漢注哀鴻相隨飛去我終不顧

二

崔嵬天門山江水遶其下寒渠已膠舟欲往豈無馬  
時恩繆拘綴私養難乞假低徊適爲此含憂何時寫  
吾能好諒直世或非詭詐安得有一廛相隨問耕者

虎圖

壯哉非羆亦非羆目光夾鏡當坐隅橫行安尾不畏  
逐顧眄欲去仍躊躇卒然我見心爲動熟視稍稍摩  
其鬚固知畫者巧爲此此物安肯來庭除想當槃礴  
欲畫時睥睨衆史如庸奴神閑意定始一掃功與造  
化論鎔銖悲風颭颭吹黃蘆上有寒雀驚相呼槎牙



死樹鳴老鳥向之俛囁如哺鷓山牆野壁黃昏後馮  
婦遙看亦下車

次韻信都公石枕蘄簟

端溪琢枕綠玉色蘄水織簟黃金紋翰林所寶此兩  
物笑視金玉如浮雲都城六月招客語地上赤日流  
黃塵燭龍中天進無力客主歆然各疲劇形骸直欲  
坐棄忘冠帶安能強修飾恃公寬貸更不疑箕倨豈  
復論官職笛材平瑩家故藏硯璞物清此新得掃除  
堂屋就陰翳公不自眠分與客知公用意每如此真  
能與物同其適豈比法曹空自私却願天日長炎赫  
公才卓犖人所驚久矣四海流聲名天方選取欲扶  
世豈特使以文章鳴深探力取常不寐思以正議排  
縱橫奈何甘心一榻上欲卧頰尾爲絜清賢愚勞佚  
非一軌顧我病昏惟未死心於萬事久翛然身寄一  
官真偶爾便當買宅歸偃休白髮溪山如願始看公  
勦力就太平却上青天跨箕尾

和吳冲卿雪

陽回力猶遘陰合勢方鞏填空忽汗漫造物誰慙慙  
輕於擘絮紛細若吹毛氄雲連畫已替風助宵仍洶  
憑陵雖一時變態亦千種簾深卷或避戶隘關猶擁  
滔天有凍浪匝地無荒隴飛揚類挾富委翳等辭寵  
穿幽偶相重值險輒孤聳積慘會將舒群輕那久重  
紛華始滿眼消釋不旋踵槁樹散飛花空簷落縣渾  
還當困炎熱以此滌煩壅共約市南人收藏不爲冗



和冲卿雪詩并示持國

地卷江海浮天吹河漢湧北風散作花巧麗世無種  
霾昏得照曜塵滓歸掩擁荒林無空枝幽瓦有高隴  
分纜一毛細聚或千鈞重飛颺窺已眩摧墜聽還克  
漁舟平繫舷樵僦沒歸踵空令物象瑩豈免川塗壅  
爭光姮娥妬失色羲和恐賴逢陽氣烝轉作水波溶  
舞庭稱賀嚴掃路傳呼寵衝遊謝壯少避卧甘閑冗  
吳侯絕俗唱韓子當敵勇勝負觀兩豪吾衰但陰拱

送石賡歸寧

虛名誤長者邂逅肯經過所操十餘篇浩蕩決江河  
側身朝市間樂少悲慙多文章舊所好久已廢吟哦  
開編喜有得一讀瘳沉痾裹飯北城陰永懷從晤歌

又欲及歲晚空堂掃絲窠稍出平生言道藝相琢磨  
忽隨鴈南飛當此葉辭柯去去黎嶺高想見青坡陀  
黃花一杯酒爲壽樂如何微詩等瓦礫持用報隋和

送張拱微出都

歸卧不自得出門無所投獨尋城隅水送子因遠遊  
荒林纏悲風慘慘吹馳裘捉手共笑語顧瞻中河舟  
嗟人皆行樂而我方坐愁腸胃繞鍾山形骸空此留  
念始讀詩書豈非亦有求一來裹青衫觸事自悔尤  
誤爲世所容榮祿今白頭塞責以區區一毛施萬牛  
不足助時治但爲故人羞寬恩許自効終欲東南流  
子今涉冬江船必泊蔡洲寄聲冶城人爲我問一丘

寄題睡軒



劉侯少忼慨天馬脫馮羈一官不得意州縣老委蛇  
新居當中條牆屋稍補治疏軒以睡名從我遠求詩  
朝廷法令具百吏但循持又况佐小邑有才安所施  
賦租如簿領獄訟了鞭笞脩然即高枕於此樂可知  
王官有空谷隱者常棲遲拂榻夢其人亦足慰所思  
嗟予久留連竊食坐無為浩歌臨西風更欲往從之  
冲卿席上得作之  
明本環坐傾杯酌天馬天胡

別離寬後悲笑語盡今樂論詩知不如興至亦同作

塞翁行

塞翁少小壟上鋤塞翁老來能捕魚魚長如人水滿  
眼桑柘死盡生芙蓉漢家新堤廣能築胡兒壯馬休  
南牧北風卷却波浪聲祗放田車行軋軋

白溝行

白溝河邊蕃塞地送迎蕃使年年事蕃使常來射狐  
兔漢兵不道傳烽燧萬里鉏耰接塞垣幽燕桑葉暗  
川原棘門灞上徒兒戲李牧廉頗莫更論

河間

北行出河間千歲想賢王胡麻生蓬中詰曲終自傷  
好德尚如此恃材宜見戕乃知陰自脩彼不為傾商



劉侯少忼慨天馬脫馮羈一官不得意州縣老委蛇  
新居當中條牆屋稍補治疏軒以睡名從我遠求詩  
朝廷法令具百吏但循持又况佐小邑有才安所施  
賦租如簿領獄訟了鞭笞脩然即高枕於此樂可知  
王官有空谷隱者常棲遲拂榻夢其人亦足慰所思  
嗟予久留連竊食坐無為浩歌臨西風更欲徃從之  
冲卿席上得作字

咨予乏時才始願乃丘壑強走十五年朱顏已非昨  
低回大梁下屢歎風沙惡所欣同舍郎誘我文義博  
古聲無惱淫真味有淡泊追攀風月久貌簡非心略  
君恩忽推徙所望頗乖錯尚憐得經過未比參辰各  
留連惜餘景從子至日落明燈照親友環坐傾杯杓

別離寬後悲笑語盡今樂論詩知不如興至亦同作  
塞翁行

塞翁少小壟上鋤塞翁老來能捕魚魚長如人水滿  
眼桑柘死盡生芡菜漢家新堤廣能築胡兒壯馬休  
南牧北風卷却波浪聲祗放田車行軋軋

白溝行

白溝河邊蕃塞地送迎蕃使年年事蕃使常來射狐  
兔漢兵不道傳烽燧萬里鉏耰接塞垣幽燕桑葉暗  
川原棘門灞上徒兒戲李牧廉頗莫更論

河間

北行出河間千歲想賢王胡麻生蓬中詰曲終自傷  
好德尚如此恃材宜見戕乃知陰自脩彼不為傾商



臨川先生文集卷第五  
區區二世家廟冊富文章教子以空言得祚果不良  
陳橋

走馬黃昏渡河水夜爭歸路春風裏指點韋城太白  
高投鞭日午陳橋市楊柳初回陌上塵胭脂洗出杏  
花勻紛紛塞路堪追惜失却新年一半春

澶州

去都二百四十里河流中間兩城峙南城草草不受  
兵北城樓櫓如邊城城中老人爲予語契丹此地經  
鈔虜黃屋親乘矢石間胡馬欲踏河冰渡天發一矢  
胡無酋河冰亦破沙水流歡盟從此至今日丞相萊  
公功第一

臨川先生文集卷第五

臨川先生文集卷第六

古詩

北客置酒

奉使道中寄育玉山長老常坦

送李屯田守桂陽二首

送吳仲庶出守潭州

雜詠三首

卽事三首

送鄭收熊歸閩

寄二弟時往臨川

李氏沅江書堂

休假大佛寺



別謝師宰

解使事泊棠陰時三弟皆在京師二首

驊騮

寄朱氏妹

贈陳景初

贈張康

送程公闢守洪州

鳳凰山

夢中作

彭蠡

牛渚

東門

和王微之登高齋三首

北客置酒

紫衣操鼎置客前巾韝稻鉢隨梁饘引刀取肉割啖  
客銀盤擘臠薹與鮮殷勤勸侑邀一飽卷牲歸館觴  
更傳山蔬野果雜飴蜜獮脯豕腊加魚煎酒酣衆史  
稍欲起小胡捩耳爭留連爲胡止飲且少安一杯相  
屬非偶然

奉使道中寄育王山長老常坦

道人少賈海上游海舶破散身沈浮抱金滿篋人所  
寄吹皺偶得還中州羸身歸金不受報祇取斗酒相  
獻酬歡娛慈母終一世脫棄妻子藏巖幽蒼煙寥寥  
池水漫白玉菡萏吹高秋夜燃栢子煮山藥憶此東



望無時休塞垣春枯積雪溜沙礫盛怒黃雲愁五更  
匹馬隨鴈起想見鄧郭花今稠百年夸奪終一丘世  
上滿眼真悠悠寄聲萬里心綢繆莫道異趣無相求

送李屯田守桂陽二首

泊船香爐峯始與子相識寄書邗江上詒我峯下石  
緣以湘水竹攜持與南北未懷故人歡不願百金易  
竹枯歸樵蘇石爛棄沙礫夷門得邂逅綠髮皆半白  
追思少時事俛仰如一夕老矣無所爲空知念疇昔  
常思一杯酒要子相解釋出門事紛紛歸卧意還劬  
聞當上湓水持詔守嶺阨方爲萬里別執手先慘戚  
茲游信浩蕩山水多所得爲我謝香爐風塵每相憶

二

蒼黃離家問南北中路思歸歸不得風濤何處不驚  
人雨雪前村更欺客舊交旌旆此盤桓見我卽令兒  
解鞍荒山樂官歌舞拙提壺沽酒聊一歡行藏欲語  
眉不展互歎別離心繾綣行年半百勞如此南畝催  
耕未宜晚

送吳仲庶出守潭州

吳公治河南名出漢廷右高才有公孫相望千歲後  
平明省門開吏接堂上肘指撫談笑間靜若在林藪  
連牆畫山水隱几詩千首浩然江湖思果得東南守  
傳鼓上清湘旌旗蔽牛斗方今河南治復在荆人口  
自古楚有材鄙渌多美酒不知樽前客更得賈生否

雜詠二首



懷王自墮馬賈傅至死悲古人事一職豈敢苟然為  
哭死非為生吾心良不欺滔滔聲利間絳灌亦何知

二

先生善鼓瑟齊國好吹竽操竽入齊人雅鄭亦復殊  
豈不得祿賜歸卧自歛歔寥寥朱絲絃老矣誰與娛

三

商陽殺三人每輒不忍視亦云食君食報禮當如此  
波瀾吹九州金石安得止來懷南山阿慷慨中夜起

卽事三首

我起影亦起我留影逡巡我意不在影影長隨我身  
交游義相好骨肉情相親如何有乖睽不得同苦辛

二

昏昏白日卧皎皎中夜愁明月入枕席涼風動衾幃  
蜚蟬相鳴悲上下無時休徒能感我耳顧爾安知秋

三

日月隨天旋疾遲與天謀寒暑自有常不顧萬物求  
蜚螭蔽朝夕蟪蛄疑春秋眇眇上古曆回環今幾周

送鄭叔熊歸閩

鄭子喜論兵魁然萬人敵嘗持一尺筆跨馬河南北  
方今邊利害口手能講畫疑師穀城翁方略已自得  
天兵卷甲老壯士不肉食低徊向詩書文字銳鐫刻  
科名又齟齬棄置非人力黃塵彫芻裘逆旅同偪仄  
秋風吹殘汴霰雪已驚客浩歌隨東舟別我無慘惻  
閩生今好遊往往老妻息南孩子所慕天命豈終塞



寄二弟時往臨川

蕭條冬風高吹我冠上霜我行歲已寒悲汝道路長  
持以一作此犬馬心千里不得將使汝身百憂辛苦冒  
川梁青燈照詩書仰屋涕數行不有親戚思詎知遠  
遊傷

李氏沅江書堂

沅江水有梁與罾沅田樹桑可蠶耕君於其間恥射  
利獨岸清泚留朱甍詩書當前日開闔冠帶滿坐相  
逢迎勉求高論出施設無以私智爲公卿

休假大佛寺

罷憊得休假衣冠倦趨翔挾書聊自娛解帶寺東廊  
六龍高徘徊光景在我裳冬屋稍暄暖病身更强梁

從我有不思捨我有不忘問誰可與言攜手此徜徉  
婉婉吾所愛新居乃鄰牆寄聲能來遊維用寫愁腸

別謝師宰

閭闔城西地如水雞鳴黃塵波浪起窮年一馬望扶  
桑東得省門身輒止簿書期會老紛紛邂逅論心喜  
有君數日未多還捨我相看愁思亂於雲

解使事泊棠陰時三弟皆在京師二首

始吾泊棠陰三子不在舟今當捨之去三子還遠遊  
茫然千里水今見荻花洲俛仰換春冬紛紛空百憂  
懷哉山川異往矣霰雪稠登高一涕泗寄此寒江流

二

泊船棠陰下灘水清且淺回首望孤城浮雲一何緬



久留非吾意欲去猶繾綣馳心故人側一望三四反  
蕭蕭東堂竹異日留息偃無恩被南國疑此行當翦

驊騮

龍德不可係變化誰能謀一本無驊騮亦駿物卓犖  
地上遊怒行追疾風忽忽跨九州轍迹古所到山川  
略能周鴻蒙無人梯沆漭遶天浮巉巖拔青冥仙聖  
所止留欲往輒不能視龍乃知羞

寄朱氏妹

昔來高郵居我始得朱子從容談笑間已足見竒偉  
行尋城陰田坐釣渠下泚歸來同食眠左右皆圖史  
入視爾諸幼歡言亦多祉當時獨張倩遠在廬山趾  
沈君未言昏名已習吾耳安知十年來乖隔非願始

相逢輒念遠悲吒多於喜今茲豈人力所念皆聚此  
諸甥昔未有滿眼秀而美低徊吾親側亦足慰勞止  
嗟予迫時恩一傳日千里尔舟亦已戒五兩翩然起  
蕭蕭東南縣望爾何時已空知夢為魚逆上西安水

贈陳君景初

吾嘗竒華佗腸胃真割剖神膏既傳之頃刻活殘朽  
昔聞今則信絕伎世嘗有堂堂潁川士察脉極淵藪  
珍丸起病瘠鱸蟲隨泄嘔攣足四五年下針使之走  
一言儻不合萬金莫可誘又復能賦詩往往吹瓊玖  
卷紙誇速成語怪若神授名聲動京洛蹤跡晦葭莠  
相逢但長嘯遇飲輒掩口獨醒竟何如無乃寡俗偶  
顧非避世翁疑是壁中叟安得斯人術付之經國手



贈張康

昔在歷陽時得子初江津手中紫團參一飲寬吾親  
捨舟城南居杖屨日相因百口代起伏呻呼聒比鄰  
叩門或夜半屢費藥物珍欲報恨不得腸胃盤車輪  
今逢又坎坷令子馳風塵顛倒車馬間起先冰雪晨  
嗟我十五年得祿尚辭貧所讀漫累車豈能蘇一人  
無求愧子義有施慙子仁逝將收桑榆邀子寂寞濱

送程公闢守洪州

畫船插幟搖秋光鳴鐃傳鼓水洋洋豫章太守吳郡  
郎行指斗牛先過鄉鄉人出郭航酒漿包鼈鱸魚炊  
稻梁芡頭肥大菱腰長醕醢喧呼坐滿牀怪君三年  
寓瞿塘又驅傳馬登大行纓旄脫盡歸大梁翻然出

走天南疆九江左投貢與章揚瀾吹漂浩無旁老蛟  
戲水風助狂盤渦忽坼千丈強君聞此語悲慨慷迎  
吏乃前持一觴鄙州歷選多雋良鎮撫時有諸侯王  
拂天高閣朱鳥翔西山蟠繞鱗鬣蒼蒼下視城塹真金  
湯雄樓傑屋鬱相望中戶尚有千金藏漂田種秔出  
穰穰沉檀珠犀雜萬商大舟如山起牙檣一本無輸此一句輸  
瀉交廣流荆揚輕裙利屐列名倡春風蹋謠能斷腸  
平湖灣塢煙渺茫樹石珍怪花草香幽處往往聞笙  
簧地靈人秀古所臧勝兵可使酒可嘗十州將吏隨  
低昂談笑指麾回雨暘非君才高力方剛豈得跨有  
此一方無爲聽客欲霑裳使君謝吏趣治裝我行樂  
矣未渠央



鳳凰山

驅馬信所適落日望九州青山滿天地何往爲吾丘  
貧賤身祇辱富貴道足羞涉世諒如此惜哉去無由  
夢中作  
青門道北雲爲屋大壚貯酒千萬斛獨龍注雨如車  
軸不畏不售畏不續

彭蠡

茫茫彭蠡春無地白浪春風濕天際東西捩柂萬舟  
回千歲老蛟時出戲少年輕事鎮南來水怒如山帆  
正開中流蜿蜒見脊尾觀者膽墮予方咤衣冠今日  
龍山路廟下沽酒山前住老矣安能學飲飛買田欲  
棄江湖去

牛渚

歷陽之南有牛渚一風微吹萬舟阻華戎蠻蜀支百  
川合爲大江神所躔山盤水怒不得泄到此乃有無  
窮淵朱衣乘車作官府操制生殺非無權陰靈祕怪  
不欲露燬犀得禍豈偶然

東門

東門白下亭摧甃蔓寒葩淺沙杙素舸一水宛秋蛇  
漁商數十室門巷隱桑麻翰林謫仙人往歲酒姥家  
調笑此水上能歌揚白花楊花飛白雪枝裏綠煙斜  
舞袖卷煙雪綺裘明紫霞風流翳蓬顆故地使人嗟  
迢迢陌頭青空復可藏鷗

和王微之登高齋三首



寒雲沈屯白日埋河漢蕩圻天如筵衡門兼旬限泥  
潦卧聽窾木鳴相挨蕭辰忽掃纖翳盡北嶺初出青  
嵬嵬微之新詩動我目爛若火齊金盤堆想攜諸彦  
眺平野高論歷詆秦以來觥船淋浪始快意忽憶歸  
雲胡為哉念君少壯輟游行發揮春秋名玉杯書成  
不得斷國論但此空語傳八垓登臨興罷因感觸更  
欲遠引追宗雷君知富貴亦何有諂譽未足償譏排  
風豪雨橫費調爨坐使髮背為黃台留賓往往夜參  
半雖有罇俎無由開江南佳麗非一日況乃故園名  
池臺能招過客飲文字山水又足供歡怡剩留官屋  
貯酒毋取醉不竭當如淮

二

六朝人物隨煙埃金輿玉几安在哉鍾山石城已寂  
寞祇見江水雲端來百年故老有存者尚憶世宗初  
伐淮魏王兵馬接踵出旗纛千里相搪挨當時謀臣  
非不衆上國拔取多陪臺龍騰九天跨四海一水欲  
阻為可哈降王北歸樓殿圻棄屋尚鎖殘金堆神靈  
變化自真主將帥何力求公台山川清明草木靜天  
地不復屯雲雷使君登高訪古昔傷此陳迹聊持杯  
因留嘉客坐披寫鄙詠笑語傾如篴酒酣重惜功業  
晚老矣萬卷徒兼該攢峰列壑動歸興憂端落筆何  
崔嵬餘年無歡易感激亦愧莊叟能安排青燈明滅  
照不寐但把君詩闔且開

三



千戈六代戰血埋雙闕尚指山崔嵬當時君臣但兒  
戲把酒空勸長星杯臨春美女閉黃壤玉枝自一作  
藥繁如堆後庭新聲散樵牧興廢倏忽何其哀咸陽  
龍移九州圻遺種變化呼風雷蕭條中原礪無水岨  
強又此憑江淮廣陵衣冠掃地去穿築隴畝爲池臺  
吳儂傾家助經始尺土不借秦人篋珠犀磊落萬艘  
入金壁照耀千門開建隆天飛跨兩海南發交廣東  
温台中間業業地無幾欲久割據誠難哉靈旗指麾  
盡貔虎談笑力可南山排樓船蔽川莫敢動扶伏但  
有謀臣來百年滄洲自潮汐事往不與波爭迴黃雲  
荒城失苑路白草廢時空壇垓使君新篇韻險絕登  
眺感悼隨嘲哈嗟予愁憊氣已竭對壘每欲相劇挨

揮毫更想能一戰數窘乃見詩人才

臨川先生文集卷第六



臨川先生文集卷第七

古詩

董伯懿示裴晉公平淮右題名碑詩用其韻

和酬

用王微之韻和酬即事書懷

和仲求即席分題得庶字

出鞏縣

書任村馬鋪

葛蘊作巫山高愛其飄逸因亦作兩篇

西風

久雨

和王勝之雪霽借馬入省



和吳冲卿鷓鴣鳴樹石屏

送李宣叔倅漳州

送裴如晦宰吳江

韓持國從富并州辟

寄吳冲卿

韓持國見訪

思王逢原

登景德塔

和劉貢甫燕集之作

寄王逢原

寄正之

思古

惜日

送裴如晦即席分題三首

董伯懿示裴晉公平淮右題名碑詩用其韻和酬

元和伐蔡何危哉朝廷百口無一諧盜傷中丞偶不死利劒白日投天街裹瘡入相議軍旅國火一再更檀槐上前慷慨語發涕誓出按撫除睽乖指撝光顏戰洄曲闕如怒虎搏虺豺愬能捕虜取肝鬲護送密乞完形骸笞兵夜半投死地雪濕不敢燃薪蕪空城豎子已可縛中使尚作嘍兒哇退之道此尤雋偉當鏤玉牒東燔柴欲編詩書播後嗣筆墨雖巧終類俳唐從天寶運中圯廊廟往往非忠佳諸侯縱橫代割



據疆土豈得無離仳德宗末年懲戰禍一矢不試塵  
蒙鞞憲皇初起衆未信意欲立掃除昏霾追還清明  
救薄蝕屢勅主府拘窮蛙王師傷夷征賦窘千里亦  
息毫釐差小夫偷安自非計長者遠慮或可懷桓桓  
晉公忠且壯時命適與功名偕是非末世主成敗烜  
赫今古誰譏排賢哉韋純議北赦倉卒兩伐尤難皆  
重華聲明彌萬國服苗干羽舞兩階宣王側身內脩  
政常德立武能平淮昔人經綸初若緩欲棄此道非  
吾儕千秋事往蹤跡在嶽石款記如湘崖文嚴字麗  
皆可喜黃埃蔽沒蒼蘚埋當時將佐盡豪傑想此兵  
禱陪祠齋君曾西遷爲拓本濡麕割蜜親劇措新篇  
波瀾特浩蕩把卷熟讀迷津涯褒賢樂善自爲美當

挂廟碑爲詩牌

用王微之韻和酬即事書懷

秦惜逝者耄晉嘉良大休古人皆好樂哀此歲月適  
嗟我抱愁毒殘年自羈囚但爲免得蹄非復天上鷗  
雖知林塘美欲往輒回輶名園一散策笑語隨觥籌  
探題遶梅花高詠接應劉宿雨洗荒壟寒蛟沈老湫  
泂洄信畫舸歸路子城幽冬風不改綠忽見新陽浮  
歡事去如夢嘉時念難留明發得君句謂將續前遊  
語我飲倡樂不如詩獻酬淮洲秦鍾磬雅刺德不猶  
文墨有真趣荒淫何足收來篇信時女窈窕衆所求  
茲理儻可諧華簪爲君抽

和仲求即席分題得庶字



刀筆漫無營圖書紛不御平生攜手人邂逅賞心處  
名卿邵朱邑膚使超嚴助都官富篇章博士熟經據  
豈特好微言又多知大慮從容故天幸倜儻盡人譽  
千艘來交荆萬舸去揚豫良無此嘉客式飲吾所庶

出鞏縣

昭陵落月煙霧昏篝火度谷行山根投鞭委轡涉數  
村寤出鞏縣城東門向來宮闕不可見但有洛水流  
渾渾

書任村馬鋪

兒童繫馬黃河曲近岸河流如可掬任村炊米朝食  
魚日暮滎陽驛中宿投老經過身獨在當時洲渚今  
平陸秣黍真冥十數家仰視荒蹊但喬木冰盤美

客自知起看白水還東馳爾來百口皆年少歸與何  
人共此悲

葛蘊作巫山高愛其飄逸因亦作兩篇

巫山高十二峯上有往來飄忽之猿猱下有出沒澆  
澗之蛟龍中有倚薄縹緲之神宮神人處子冰雪容  
吸風飲露虛无中千歲寂寞無人逢邂逅乃與襄王  
通丹崖碧嶂深重重白月如日明房龔象牀玉几來  
自從錦屏翠幔金芙蓉陽臺美人多楚語祗有纖腰  
能楚舞爭吹鳳管鳴鼉鼓那知襄王夢時事但見朝  
朝暮暮長雲雨

二

巫山高偃薄江水之滔滔水於天下實至險山亦起



伏爲波濤其巔冥冥不可見崖岸斗絕悲猿赤楓  
青櫟生滿谷山鬼白日樵人遭窈窕陽臺彼神女朝  
朝暮暮能雲雨以雲爲衣月爲楮乘光服暗無留阻  
崑崙曾城道可取方丈蓬萊多伴侶塊獨守此嗟何  
求況乃低徊夢中語

西風

少年不知秋喜聞西風生老大多感傷畏此蟋蟀鳴  
況乃捨親友抱病獨遠行中夜卧不周惻惻感我情  
起視天正黑弱雲亂縱橫似有霰雪飄不復星斗明  
時節忽如此重令壯心驚諒無同憂人樽酒安可傾

久雨

煤炷著天無寸空白沫上岸吹魚龍羲和推車出不

得河伯欲取山爲宮城門晝開眠百賈飢孫得糟夜  
哺翁老人慣事少所怪看屋箕踞歌南風

和王勝之雪霽借馬入省

泥水填馬不受轍瓦雪得火猶藏溝宿霧紛紛度城  
闕朔氣凜凜吹衣裘窮閭閉門無一客剝啄驚我有  
前騶強隨傳呼出屋去臯息凍合髭繆繆投韁馬鬣  
任歌側欲出操筆手還抽行思江南悲故事溪谷冬  
暖花常流前年臘歸三見白霽色嶺上班班留杖藜  
此時將邑子登眺置酒身優游豈如都城今日事祇  
恐一蹶爲親憂因知田里駕款段昔人豈即非良謀  
君家洛陽名實大談笑枯槁回春柔平生意氣故應  
在白髮未敢相尋求從容退食想佳節豈無歌聲相



獻酬奈何亦作苦寒調歎息朝夕無驕騶超然遂有  
江湖意滿紙爲我書窮愁相如正應居客右子路且  
莫乘桴浮

和吳冲卿鷓鴣鳴樹石屏

寒林昏鷓相與還下有跂石蒼孱顏曾於古圖見髣  
髴已怪刀筆非人間君家石屏誰爲寫古圖所傳無  
似者鷓飛歷亂止且鳴林葉慘慘風煙生高齋日午  
坐中見意似落日空上行君詩雄盛付君手云此非  
人乃天巧嗟哉渾沌死乾坤至造作萬物醜妍巨細  
各有理問此誰主何其精恢竒譎詭多可喜人於其  
間乃復雕鑿刻畫出智力欲與造化追相傾拙者婆  
娑尚欲奮工者固已窮夸矜吾觀鬼神獨與人意異

雖有至巧無所爭所以號山間埋沒此寶千萬歲不  
爲見者驚吾又以此知妙偉之作不在百世後造始  
乃與元氣并畫工粉墨非不好歲久剥爛空留名能  
從太古到今日獨此不朽由天成世人尚竒輕貨力  
山珍海怪採掇今欲索此屏後出爲君得胡賈欲價  
著不識吾知金帛不足論當與君詩兩相直

送李宣叔倅漳州

關山到漳窮地與南越錯山川鬱霧毒瘴癘春冬作  
荒茅篁竹閒蔽虧有城郭居人特鮮少市井宜蕭索  
野花開無時蠻酒持可酌窮年不用客誰與分杯杓  
朝廷尚賢俊磊砢充臺閣君能喜節行文藝又該博  
超然萬里去識者爲不樂予聞君子居自可救民瘼



苟能禦外物得地無美惡似聞最南方北客今勿藥  
林麓換風氣獸虵凋毒蠹如漳猶近州氣冷又銷鑠  
珍足海物味其厚不爲薄章舉馬甲柱固已輕羊酪  
蕉黃荔子丹又勝楂梨酢逢衣比多士往往在丘壑  
從容與笑語豈不慰寂寞太守好觴詠嘉賓應在幕  
想即有新詩流傳至京洛

送裴如晦宰吳江

霜一作震澤與天杳旁臨無限情他時散髮處最愛垂  
虹亭飄然平生遊捨我戴吳星欲往獨不得郤門看  
揚舲到縣問疾苦爲子求所經當知耕牧地往往莢  
蒲青三江斷其二泮水何由寧微子好古者此歌尚  
誰聽

韓持國從富并州辟

韓侯冰玉人不可塵土雜官雖衆俊後名字久訶嗑  
并州天下望撫士威愛愜千金棄不惜賓客常滿閣  
遙聞餘風高爲子置一榻親交西門餞百馬驕雜還  
子材宜用世談者爲嗚喑矧今名主人氣力足呵欲  
推賢爲時輔執若朽易拉會當薦還朝立子在閭闔  
惜哉秣騏驥賦以升龠合咨予栖栖者氣象已摧塌  
他年佐方州說將尚不納況於聲勢尊豈易取酬答  
有如持寸莛未足感鞶鞶顧於山水間意願多所合  
匡廬與韶石小小已嘗蹋風遊會稽春雪宿天柱臘  
淮湖江海上慣食蝦蟹蛤西南窮岷嶓東北盡濟漯  
身雖未嘗歷魂夢已稠沓荆溪最所愛映燭多廟塔



溪果點丹漆溪花團繡罨扁舟信所過行不廢樽榼  
一從捨之去霜雪行滿頷思之不能寐感若蚤蚋嗜  
方將築其濱畢景謝尊嗜安能孤此意顛倒就衰颯  
唯子余所嚮嗜好此鷓鴣何時歸相過遊屐尚可蠟

寄吳冲卿

物變極萬殊心通纔一曲讀書謂已多撫事知不足  
與君語承華念此非不夙恨無數頃田歸耕使成熟  
當官拙自計易用忤流俗窮年走區區得謗大於屋  
歸來汗省舍又繼故人躅相逢祇數步吏按常填自  
切磋非無傷阻濶嗟何速孤危失所助把卷常恨獨  
虛名終自誤謬恩何見見覺清明有冲卿奧美如晦叔  
時謂當選升屈指尚五六揆才最不稱號養寵寧無恧

殷勤故人書紙尾又見勗君雖好德言我自望忠告  
易稱動不括傳論大明服進爲非成材罪恐不容贖  
歲殘東風生陝樹塵翳麴何緣一杯酒談笑相追逐

韓持國見訪

余生非匏瓜於世不無求弱力憚耕稼衣食當周流  
起家始二十南北今白頭愁傷意已敗罷病恐難瘳  
江湖把一節屢乞東南州治民豈吾能閒僻庶可偷  
謬恩當徂冬龜勉始今秋豈敢事高蹇茫然乖本謀  
撫心私自憐仰屋竊歎愀強騎黃飢馬欲語將誰投  
賴此城下宅數蒙故人留攬衣坐中庭仰視白雲浮  
白雲御西風一一向滄洲安得兩黃鵠跨之與雲遊

思王逢原



自吾失逢原觸事輒愁思豈獨爲故人撫心良自悲  
我善孰相我孰知我瑕疵我思誰能謀我語聽者誰  
朝出一馬驅暝歸一馬馳馳驅不自得談笑強追隨  
仰屋卧太息起行涕淋漓念子冢上土草茅已紛披  
婉婉婦且少瑩瑩一女嫠高義動閭里尚聞致財貲  
嗟我衣冠朝略能具饘糜葬祭無所助哀顏亦何施  
聞婦欲北返跂予常望之寒沐已閉口此行又參差  
又說當產子產子知何時賢者宜有後固當夢熊羆  
天方不可恃我願適在茲我疲學更誤與世不相宜  
宿昔心已許同岡結茅茨此事今已矣已矣尚誰知  
渺渺江與潭茫茫山與陂安能久竊食終負故人期

登景德塔

放身千仞高北望太行山巴屋如螳豸蔽虧塵霧間  
念此屋中人當復幾人閑雞鳴起四散暮夜相與還  
物物各自我誰爲賢與頑賤氣即易凌貴氣即難攀  
愧予心未齊俛首一破顏

和劉貢甫燕集之作

馮侯天馬壯不羈韓侯白鷺下清池劉侯羽翰秋欲  
擊吳侯葩萼春爭披沈侯玉雪照人潔蕭灑已見江  
湖姿唯予貌醜駭公等自鏡亦正如蒙俱忘形論交  
喜有得杯酒邂逅今良時心親不復異新舊便脫巾  
屨相諧嬉空堂無塵小雨定濃綠翳水浮秋曦高談  
四坐掃炎熱木末更送涼風吹此歡不盡忽分散明  
月照屋空參差平明餘清在心耳洗我重得劉侯詩



劉侯未見聞已熟吾友稱誦多文辭才高意大方用  
世自有豪俊相攀追咨予後會恐不數魂夢久向東  
南馳何時扁舟却顧我還欲迎子遊山陂

寄王逢原

北風吹雲埋九咳草木零落空池臺六龍避逃不敢  
出地上獨有寒崔嵬披衣起行愁不愜歸坐把卷闔  
且開永懷古人今已矣感此近世何爲哉申韓百家  
藝火起孔子大道寒於灰儒衣紛紛欲滿地無復氣  
焰空煤炀力排異端誰助我憶見夫子真竒材梗枿  
豫章槩白日祗要匠石聊穿裁我方官拘不得往子  
有閑暇宜能來晤言相與入聖處一取萬古光芒迴

寄正之

少時已感韓子詩東西南北俱欲往新年尤覺此語  
悲恨無羽翼超惚恍肺肝欲絕形骸外涕洟自落衣  
巾上此憂難與世共知憶子論心更惆悵

思古

古之士方窮材行已云貴大臣公聽采左右不得蔽  
或從蒿藜間入據廊廟勢小夫不敢望云我非其彙  
朝遊僑者羞暮出逢者避所以後世愚人願高位

惜日

白日照四方當在中天留春風地上行當與時周遊  
和氣所披拂槁乾却濕柔愛欲傳萬物勢難停一州  
棲棲孔子者惜日此之由不能使此邦利澤施諸侯  
豈若駕以行使我遇者稠當時三千人齊宋楚陳周



小者傳吾粗大能傳奧幽道散學以聖衆源乃常流  
吾初如匏瓜彼亦孰知丘唯士欲自達窮通非外求  
暨必相天子乃能經九疇行雖耻強勉閉戶非良謀

送裴如晦即席分題三首

以黯然消魂惟別而已爲韻擬

而惟字韻作

飄然五湖長昨日國子師綠髮約略白青衫欲成緇  
牽舟推河水去與山水期春風坐虹亭一杯湖上持  
傲兀何賓客兩忘我與而能復記此飲詩成酒淋漓

二

十月欸水冰問君行何爲行不顧斗米自與五湖期  
平生湖上遊幽事略能知此後君最樂窮年得游嬉  
彩鯨抗波濤風作鱗之而鳴鼓上洞庭笑看紅橘垂

漠漠大梁下黃沙吹酒旗應憐故人愁回首一相思

三

邂逅君子堂一杯相與持便應取酪酏萬事不足惟  
平明蔡河風回首成差池獨我漫浪者尚得行相追  
磨刀鱠嚴冬宿昔少陵詩還當捕鱸魚載酒與我期  
甫里松菊盛洞庭柑橘垂文章爲我唱不數陸與皮

臨川先生文集卷第七



論八代中世文學の概観

南甲丁休藤原朝臣致時論評學文章論致時不燬論致時

論八代中世文學の概観

平陽本可風臣致時論評學文章論致時不燬論致時

論八代中世文學の概観

論八代中世文學の概観

論八代中世文學の概観





程